

També encuanto Violencia Domestico

mr. dr. Alida 'Lily' Marval cu investigacion riba Violencia contra Hende Muher

ORANJESTAD (AAN): Nos a caba di disfruta di un Carnaval bunita, luhoso, alegre cu a deleita nos y cu kizas a pone nos hasta baila un poco. Awor ta sigui e temporada di Cuaresma. Tempo pa para keto y reflecciona riba nos bida, sea como hende jong of cu mas edad, un adulto mayor: madushi of padushi, of sea como un profesional.

Con mi bida ta? Mi ta felis? Dicon no? Tin problema na cas? Na trabou? Ki sorto di problema? Nos ta trata otro di un manera no bunita? Esey a pone mr. dr. Alida Marval, mihor conoci como Lili, dicidi di comparti cu pueblo di Aruba su investigacion tocante violencia domestico y entre pareha. E investigacion lo ser presenta na Papiamento den partinan den DIARIO cu ta facil pa pueblo lesa.

Den e investigacion aki ta ser uza 2 teoria cu ta extremo di otro. Un ta e teoria di Patriarchismo y e otro ta e Teoria di e Feminismo.

Patriarchismo ta bin di Patriarca y kier men cu ta e homber ta Cabes di e famia y e ta esun cu ta manda, esun cu por tuma decisionnan. E hende muhe NO tin ningun derecho!

E teoria di Feminismo a lanta cabes na Merca unda



un par di hende muhe a cuminsa pidi e derecho di votacion. Mayoria di e hende muhenan di e grupo aki tabata hende muhe cu a studia, cu tabatin un puesto relativamente halto of tabata un dokter, un maestra of profesora of tabata casa cu un homber cu a studia of cu tabatin un puesto halto y tabatin otro manera di pensa. Ta logico cu nan no a acepta di ser trata manera un hende cu no bal nada. Pa nan haya e derecho di vota nan a pasa den un tempo di ser desprecia, zundra, mester a tende tur sorto di desprecio y chercha.

Pero e lucha a sigui y poco poco nan tabata haya mas sosten. Na paisnan di Europa gruponan di hende muher a cuminsa lanta y pidi pa e derecho di vota. Esey tabata e comienzo di e Tratadonan Mundial pa elimina e maltrato di e

Hende Muhe y pa introduci e principio di igualdad di derecho pa Hende Homber y Hende muhe.

Den e investigacion aki bo ta bay topa cu partinan cu ta midi e emocionnan di e hende muhenan y tambe un parti unda ta puntra ta ken ta e agresor. Esey kier men: esun cu a haci e maltrato. Esaki ta ehempelnan di loke e pensamiento Feminismo ta exige cu mester tin den un investigacion tocante maltrato di hende muhe. E cifranan ta importante pero no lo mas importante ta pa muestra e daño fisico y emocional cu ta ser haci na un ser humano, den e caso aki: na un hende muhe.

Awe ta cuminsa den DIARIO cu Capitulo 1 poni banda di e articulo aki. Keda pendiente pa tur 32 Capitulo.

Investigacion

— Capitulo 1 —

Informacion general: Diferencia entre Violencia entre Pareha (IPV) y Violencia Domestico (IV)

Skirbi pa: mr. dr. Alida 'Lily' Marval

E titulo di e investigacion nacional cu a ser haci na Aruba ta: **Experiencianan di Hende Muhe tocante Violencia di Pareha den relacionnan heterossexual y e consecuencianan negativo pa e salud.**

Esaki a cuminsa na aña 2016 ora cu e ministro di Asuntunan Social a bay Ginebra, Suiza pa atende reunionnan tocante asuntunan di derecho humano y a ser muestra cu ainda Aruba no a cumpli cu e demanda di algun tratado internacional pa haci un estudio of investigacion nacional tocante violencia contra hende muhe y tambe contra mucha.

E minister a acerca mi pasobra mi a yega di haci un estudio caba riba e tereno aki: Aanpak Huiselijk Geweld op Aruba na 2013.

Mi a cuminsa traha prome riba un cuestionario cu a bira basta largo pasobra ora mi a cuminsa lesa literatura riba e topico aki, mi a topa cu varios exigencia di e World Health Organization (Organizacion Mundial di Salud) tocante loke nan ta exige cu un bon investigacion mester contene. Pa e motibo ey e investigacion aki tin un parti cuantitativo consistiendo di 10 subparagraaf y un parti cualitativo consistiendo di 16 entrevista cu profesionalnan cu ta traha riba e tereno di violencia di pareha y violencia domestico. Tambe tin 3 Capitulo: Introduccion, Literatura y Metodologia.

Den e Capitulo di Introduccion tin menciona e diferencia entre Violencia entre Pareha (IPV) y Violencia Domestico (DV). Violencia entre Pareha ta muestra cla cu ta trata di un problema entre un pareha. Den e capitulo cu ta trata di Violencia Domestico ta trata di violencia entre rumannan of otro miembronan di e famia, manera, tio y tianan, madushi y padushi y otro miembronan di famia.

Necesidad di e investigacion aki: E investigacion aki tabata hopi necesario pasobra tur dia por lesa den corant con parehanan ta bringa cu otro te manda e victima hospital. Y no parehanan so, pero maltrato di mucha y hasta di baby. Nos tur conoce casonan di maltrato di pareha cu a caba den morto mas tanto di e hende muhe. Casonan tambe di maltrato di mucha menor di edad, y hasta morto di mas cu un baby.

Nos tur a lesa di muchanan chikito y otronan menor di edad cu a ser abusa sexualmente. Esey por tin como consecuencia cu e mucha cu a ser abusa lo keda marca pa resto di su vida y traumatiza, cu tin como consecuencia cu e mucha ey, sea mucha muhe of mucha homber, lo no por lubida y lo busca alivio despues den uzo di alcohol y droga. Y hasta por yega na e decision final di comete suicidio. Varios casonan tragico a yama atencion di tur hende, ciudadanonan, docternan, sociologonan y psiquiatranan, polisnan y gobernantenan.

Cada aña e cantidad di casonan ta bira mas grandi. Algo mester ser haci pa e problema aki no bira pio. Na 2018 e Gobierno na mando a instala un Comision pa studia e Crisis Social y esaki a ser institui cu e tarea pa recolecta data di informacion riba cada problematico; prevencion; intervencion y solucion. Tabatin tambe e problema di e mamanan Teenagers y dropouts. Y e problemanan comun manera ladronicia y bringamento cu resultadonan fatal, etc.

E proposito di e investigacion ta pa haya sa con grandi e problema ariba menciona ta, tiponan di violencia, consecuencianan, con pa baha e violencia domestico y publico y e recommendacionnan na Gobierno pa combati e violencia en general, domestico, y entre pareha.

